

A Historia da  
Literatura Galega

07

# Os ilustrados galegos



*La Voz de Galicia*



## **A HISTORIA DA LITERATURA GALEGA**

• UN PROXECTO EDITORIAL DE ERA PUBLICACIONES, S.L.

• COORDINADOR XERAL: JOSÉ ANTONIO PONTE FAR

**Textos:** M.<sup>a</sup> Luz Ínsua Ramil, M.<sup>a</sup> Eva Ocampo  
Vigo, Esperanza Piñeiro de Sanmiguel,  
José A. Ponte Far e Áurea Ramil Díaz

### **Corrección lingüística:**

M.<sup>a</sup> Luz Ínsua Ramil e Áurea Ramil Díaz

**Deseño:** M. Malvido

### **Maquetación e montaxe:**

M.<sup>a</sup> Teresa Puga, María G. Grandal

**Produción:** Irene Montero, Raquel G. Amarelle,  
Lucía Taboada, Victoria G. Lastra, Rebeca Zapata,  
Pilar Freire, Silvia Valdés, Ana E. Martínez,  
Nieves G. Centeno

**Fotografía:** Octo Gráfica

**Agradecementos:** Museo de Pontevedra,  
Arquivo do Reino de Galicia e Biblioteca  
Universitaria USC [BUSC]

**Edita:** © Era Publicaciones, S.L.

© desta edición: La Voz de Galicia, S.A.

**Imprime:** Imprenta Mundo

**Depósito Legal:** C 1597-2010

**ISBN:** 978-84-96561-30-4

A Historia da  
Literatura Galega

07

## OS ILUSTRADOS GALEGOS

La Voz de Galicia



## ÍNDICE

7	<b>1. O PADRE FEIXOO. [BENITO JERÓNIMO FEIXOO E MONTENEGRO]</b>
8	1.1. O pensamento de Feixoo
13	1.2. A súa obra
17	<b>2. O PADRE MARTÍN SARMIENTO. [PEDRO JOSÉ GARCÍA BALBOA]</b>
23	2.1. A súa obra
25	2.2. Defensa da cultura galega
27	2.3. Defensa do idioma galego
32	2.4. As 1.201 coplas galegas
39	<b>3. JOSÉ CORNIDE SAAVEDRA</b>
40	3.1. A súa obra
41	3.2. Estudos sobre o galego e creación literaria
47	<b>4. OUTROS ILUSTRADOS</b>
47	4.1. O cura de Fruíme
50	4.2. O Padre Sobreira
56	4.3. María Francisca de Isla e Losada
57	4.4. Lucas Labrada Romeu
58	4.5. Irmáns do Padre Feixoo

O Padre  
Feixoo foi  
considerado  
no seu  
tempo como  
un gran  
pensador e  
erudito  
escritor





*En Galicia as ideas da Ilustración, aínda que defendidas por unha minoría de persoas, maniféstanse con forza na segunda metade do século XVIII, xerando un destacado esplendor cultural*

## O PADRE FEIXOO [BENITO JERÓNIMO FEIXOO E MONTENEGRO]

[CASDEMIRO, OURENSE, 1676 – OVIEDO, 1764]

Nace en 1676 na aldea de Casdemiro, na provincia de Ourense. É o primoxénito dunha familia nobre, pero renuncia aos seus dereitos ao ingresar na orde beneditina. Primeiro estuda no mosteiro de Santo Estevo de Ribas de Sil, e, aos 14 anos, en 1690, faise novicio no mosteiro de Samos [Lugo].

De monxe, reside e traballa no mosteiro de Lérez e no de Poio [Pontevedra]. No entanto, na cidade de Oviedo fixará a súa residencia. Alí imparte docencia na Universidade, como catedrático de Teoloxía. Retirado do ensino en 1739, dedícase exclusivamente a escribir e a achegar os

(III)

## NOTICIA

*De la Vida y Obras del M. I. y R. P.  
D. Fr. Benito Gerónimo Feijóo,  
Monge Benedictino de la Congregacion  
de España, Catedrático de Prima de  
Teología Jubilado de la Universidad  
de Oviedo, Maestro General por su  
Orden, del Consejo de S. M.*

EN un tiempo en que gemia la España baxo de la ignorancia, y las letras habian degenerado en una lastimosa série de preocupaciones, nació D. Benito Gerónimo Feijóo á 8 de Octubre de 1676 en Casademte, pequena Aldea de la Feligresia de Santa Maria de Melias en el Obispado de Orense, á las riberas del Río Miño, poco mas abaxo de su confluencia y union con el Río Sil.

Sus Padres D. Antonio Feijóo Montenegro, y Doña Maria de Puga, correspondiendo á lo ilustre de su nacimiento, educaron este joven en los principios del verdadero temor de Dios, y le inclinaron á las letras, aunque era el primogénito de su casa; creyendo con razon, que el derecho de la sucesion no les permitia descuidar en la ensenanza de este tierno hijo.

No es muy comun en el Reyno aplicar al estudio los primogénitos, y por eso tambien son menos los que salen utiles á la Iglesia y al Estado; persuadiéndose no pocos que esta qualidad les destina solo á la

a 2

pro-

seus vastos coñecementos en debates científicos e filosóficos. Para ampliar a súa formación e poder ler libros noutros idiomas, Feixoo non dubida en aprender francés, inglés e italiano.

Morre en Oviedo en 1764, sendo considerado no seu tempo como un gran pensador e erudito escritor.

## 1.1. O PENSAMENTO DE FEIXOO

Cando se retira do ensino, en 1739, Feixoo dedícase a difundir os seus coñecementos científicos e filosóficos

Realiza análises rigorosas e críticas dos máis diversos temas. O seu pensamento filosófico versa sobre os seguintes aspectos:

- Denuncia da ignorancia, a superstición e a falsa piedade relixiosa, xa que considera que no pobo domina a crenza en tradicións, milagres e lendas do imaxinario popular. Avoga por purificar a relixión católica, apartándoa desas crenzas, polo que sofre duros ataques.



- Posta en evidencia do atraso científico da ciencia española con respecto a Europa. Incide especialmente no atraso da Medicina. Sostén a conveniencia do método experimental na investigación científica universitaria.

- Crítica social. Defende os méritos persoais e a propia capacidade para acceder a cargos de calquera índole. Critica os privilexios e ociosidade das clases máis favorecidas no Antigo Réxime.

Benito  
Jerónimo  
Feixoo fíxose  
novicio no  
mosteiro de  
Samos



## LENDAS ORAIS GALEGAS

As lendas recompiladas polos ilustrados galegos foron pasando de pais a fillos a través da cultura oral. Gravado da *Ilustración galega e asturiana*



→ Os mitos e as lendas son unha parte importante da cultura popular galega; en Galicia existen tantas lendas como aldeas ou montes. O seguinte parágrafo do libro *Las Leyendas tradicionales galegas* de Leandro Carré Alvarellos resume a esencia destas historias: «En calquera pobo, cidade, vila, aldea ou casa, acontecen e aconteceron en todo tempo

acontecementos e sucesos de índole varia. Algúns deles poden ser extraordinarios por calquera circunstancia especial. Velaí a orixe dunha lenda, xa que os que presenciaron o suceso, o referirán aos seus familiares e amigos, e estes, á súa vez, comunicarano a outras persoas; e así, sucesivamente, pasará o relato de boca en boca e de pais a fillos, ou dunha vila a outra. Porque, como xa dixen, a lenda é unha narración de fondo histórico, real, desvirtuada ou modificada pola tradición oral de xeracións sucesivas».



A peculiar situación da lingua galega, relegada exclusivamente á fala das clases populares, define a importancia desas primeiras voces que se alzaron –as dos Ilustrados galegos– en contra desta inxusta situación. O tempo histórico que nos ocupa [finais do século XVIII] marca a fronteira entre a transmisión por vía oral e a plasmación dos primeiros escritos en galego da época moderna. Foron os Ilustrados os que, fronte ás críticas do poder establecido, estudaron o galego e reivindicaron o seu valor como lingua de cultura.

O seu labor contribuíu a que ata os nosos días chegasen lendas e contos de todo tipo; relatos baseados en feitos históricos pero que contan con certos elementos fantásticos que creceron á sombra de fazañas heroicas como é o caso da mítica batalla entre Hércules e Xerión que deu lugar á fundación da Coruña ou a chegada de Teucro a Pontevedra. Moi numerosas son as lendas relixiosas, asociadas na maioría dos casos a milagres de santos ou virxes.\*



- Preocupación polo desenvolvemento agrario. Teoriza sobre a importancia da formación de campesiños para mellorar as técnicas e conseguir progreso e rendibilidade das producións, como único modo de superar a miseria.

Un dos alicerces  
do pensamento  
filosófico de  
Feixoo é a  
preocupación polo  
desenvolvemento  
agrario para  
superar a miseria.  
Gravado da  
*Ilustración galega  
e asturiana*



## 1.2. A SÚA OBRA

A obra de Feixoo é ampla e complexa. De saber enciclopédico, escribe sobre innumerables cuestións.

Fai traballos sobre o idioma da súa terra natal, nun momento en que estaba moi desprestixiado como lingua de cultura. Defende o galego e equipárao en importancia co castelán e o portugués. Con todo, aínda que dominaba a lingua galega oral da época da súa infancia e adolescencia, non escribe nada nese idioma.

Parece unha contradición defender o uso do galego e escribir en castelán. Pero debe entenderse no contexto histórico. Galicia tiña un idioma falado polo pobo, pero desprezado polas elites. Había varios séculos que estaba reducido a lingua oral, xa que apenas se empregaba por escrito. Polo tanto, entrañaba gran dificultade es-





## THEATRO CRITICO UNIVERSAL,

ó Discursos varios en todo género de materias,  
para desengaño de errores comunes:

ESCRITO

POR EL MUY ILUSTRE SEÑOR  
D. FR. BENITO GERONYMO FEYJOÓ Y MONTENEGRO,  
Maestro General del Orden de San Benito,  
del Consejo de S. M. &c.

TOMO PRIMERO.

NUEVA IMPRESION,

En la qual ván puestas las adiciones del Suplemento en sus lugares.



MADRID. M.DCC.LXIX.

Por D. JOACHIN IBARRA, Impresor de Camara de S. M.

Con las Licencias necesarias.

A costa de la Real Compañía de Impresores, y Libreros.

*Teatro Crítico  
e Universal*  
reivindica as  
principais  
glorias de  
Galicia

cribir en galego longos textos con complicadas argumentacións, empregando un idioma que carecía de normas ortográficas e de gramática, que adoecía dun léxico culto, en definitiva, co que non sabían comunicar por escrito un pensamento complexo. Con todo, Feixoo é un pioneiro en defender o galego. Mesmo, cen anos máis tarde, cando co Rexurdimento se faga xa literatura de calidade en galego- nos ensaios e es-

critos cultos non literarios seguirase escribindo en castelán. É o caso de Murguía, articulista, ensaísta e historiador en castelán, ao tempo que é un dos galeguistas máis activos de fins do século XIX e principios do XX, e impulsor de que Galicia se dote dun dicionario e dunha gramática galega.



Comprometido coa realidade de Galicia e coa defensa do galego, o Padre Feixoo ten toda a súa obra en castelán, naquel momento idioma de comunicación cun público culto.

De entre os libros do Padre Feixoo, o máis coñecido é *Teatro Crítico Universal*, no que incorpora ás principais «glorias» de Galicia coa finalidade de reivindicar o bo nome desta terra, tan desprezada. Escribe tamén *Cartas eruditas e curiosas* e *Poesías varias*. As súas publicacións tiveron un enorme éxito e difusión en vida en toda España, polo que foron reeditadas varias veces.

Polo contido dos seus escritos, recibe críticas dos sectores máis conservadores, e ata ten problemas coa Inquisición. Entre os seus máis destacados defensores atópase o Padre Martín Sarmiento.

O Padre Feixoo tivo un gran recoñecemento en vida. Os seus libros acadaron enorme difusión, e foron obxecto de varias edicións.



Martín Sarmiento  
naceu en  
Villafranca del  
Bierzo en 1695

## O PADRE MARTÍN SARMIENTO<sup>2</sup> [PEDRO JOSÉ GARCÍA BALBOA]

[VILLAFRANCA DEL BIERZO, 1695-MADRID, 1772]

Amou e defendeu a Galicia e sempre se considerou galego. Fillo de pais galegos, en 1695 naceu, por azar, en Villafranca del Bierzo, onde o seu pai, de profesión mestre arquitecto, estaba dirixindo unhas obras. Naceu, polo tanto, fóra dos límites administrativos de Galicia, pero dentro da antiga Gallaecia, nunha zona na que aínda hoxe perdura o cultivo da lingua e da tradición galegas. En Villafranca naceran tamén tres irmáns.

Aos catro meses chega a Galicia, pois o seu pai vén a Pontevedra a traballar. E Pontevedra será o lugar de referencia da súa infancia, onde





Inscripción no  
mosteiro de  
San Bieito de  
Lérez en  
recordo de  
Sarmiento e  
Feixoo

estudou [no colexio da Compañía de Xesús, en Lérez e en Poio], e onde nacen un irmán menor, co que manterá sempre unha gran relación, e unha irmá. Sempre recordará a Pontevedra co nome de «boa vila».

Hai unha anécdota que Sarmiento recorda de cando estaba aprendendo a ler: na igrexa do Hospital de San Xoán de Deus, de Pontevedra, unha grande inscrición puña «Fe, Esperanza e Caridade» en latín, é dicir, «Fides, Spes, Caritas» e el interpretábao como «Feas son estas caritas».

Aos 15 anos, en 1710, marcha a Madrid e ingresa no mosteiro de beneditinos de San Martín, onde profesa ao ano seguinte. Entón, cambia o seu verdadeiro nome, Pedro José García Balboa, polo de Martín, talvez por ser o do convento. E escolle Sarmiento, o seu quinto apelido, que, ademais, era común en pai e nai.

Posteriormente vivirá en Salamanca, Oviedo e, sobre todo, en Madrid. Alí, polos seus enormes coñecementos e intelixencia, asesora a membros da corte e aos reis ilustrados borbóns, a Felipe V e a Fernando VI.

Pontevedra  
será o lugar de  
referencia da  
infancia de  
Sarmiento



Pontevedra Coleccion G. del 1 al 15.  
No. 4. Jardines del Ayuntamiento.

W. F. Dineen - Michelena 184



## PLANTA MEDICINAL CARQUEIXA

→ Así refírese o Padre Sarmiento á carqueixa na súa obra «Nomes de plantas e comúns recollidos e explicados na viaxe a Galicia de 1745», que encontramos no *Catálogo de voces e frases da lingua galega*, de José Luís Pensado:

As propiedades  
medicinais da  
planta da  
carqueixa foron  
moi valoradas polo  
Padre Sarmiento

*«O que eu cría é erro, pois cría que en Pontevedra era carqueixa o que realmente é o codeso [ou cytiso] e así rectifíquese o que teño dito sobre carqueixa nos Papeis de Madrid. A carqueixa, que ten as flores amarelas, non ten propiamente follas pero tenas comocartilagines do ramo, e son dous ou tres seguidas da figura da folla do Carballo, e así sospeito que a voz carqueixa, cerquito, cerqueiratodo vén de quercus».*

Máis tarde, fará referencia á planta e ás súas propiedades en múltiples cartas:

*«Presto acharaste que che remitirán de Samos o meu papel da carqueixa novo,*





que dei ao  
Reverendísimo Rábago e  
el posúe o orixinal. Nel  
verás os seus prodixios  
e creme que para esa  
gota inminente é do  
caso baños da  
carqueixa. Acá fai  
prodixios en materia de  
reumatismos pero non  
os fará en Galicia pola  
cerrilidad dos nosos  
paisanos e pola súa  
fátua credulidade a  
médicos idiotas, a xeito

de morriña. Non a tomes pola boca,  
senón en baños de pernas, pois iso non  
che pode facer dano». Carta 76 1759,  
setembro, 26.

**Martín Sarmiento [1732-1770]:**

Epistolario do PÁX. Sarmiento, ed. de  
Xosé Filgueira Valverde e MTM Xesús  
Fortes Alén.\*

Volverá a Galicia tres veces, en tres viaxes. Na primeira delas, en 1725, só visita Pontevedra, camiño de Oviedo. Na súa segunda estancia, en 1745, cando ten 50 anos de idade, percorre o territorio galaico observando e anotando todo canto escoita e ve, co seu nome en galego. Na súa terceira viaxe, en 1754, continúa o seu periplo de norte a sur, durante ano e medio, para proseguir a toma de datos. Realiza detallados estudos sobre instrumentos, peixes, animais, árbores... Nunha destas viaxes, sofre unha caída en Celanova e cúrase utilizando carqueixa, polo que comeza a recoller tamén notas sobre o valor medicinal das plantas.

Morre en Madrid, en 1772, admirado e respectado polos seus coetáneos e sempre soñando con Galicia.

**O** Padre Sarmiento fai tres viaxes por Galicia, en 1725, 1745 e 1754, nas que realiza traballo de campo, anotando todo o que ve ou escoita.






## 2.1. A SÚA OBRA

Sarmiento é un polígrafo, que sabe e escribe sobre os máis variados temas. É un sabio ilustrado, prototipo dos homes da Ilustración do século en que vive, o XVIII. Pódese dicir que é unha especie de enciclopedia, que sabe de todo. Está informadísimo respecto do que está a acontecer non só en España, senón no resto do mundo. É pensador, crítico, científico, botánico, filólogo. Estudou Filosofía e Arte. É un apaixonado da Arquitectura e das Matemáticas. É un sabio intelectual que ten coñecementos de Comercio, de Belas Artes. Un home de ciencia e de consulta, consciente do atraso científico español con respecto a Europa.


Critica a superstición e a ignorancia, e compatibiliza unha profunda e tradicional fe coa defensa da razón. Non é o monxe das mil caras, é o monxe dos mil pensamentos.

Manifiesto  
sobre san  
Bieito escrito  
por Martín  
Sarmiento





Aínda que o  
Padre  
Sarmiento vive  
gran parte da  
súa vida en  
Madrid, será  
un dos máis  
destacados  
defensores de  
Galicia e da  
súa lingua



Escrebe continuamente. As súas opinións e conclusións redáctaaas de forma pedagóxica e divulgativa. Deixou 40.000 páxinas manuscritas, pero en vida non publica máis nada que unha obra, en defensa do Padre Feixoo. Coñeceuno na súa estancia en Oviedo entre 1723 e 1725, onde Feixoo era mestre de estudantes, catedrático de Universidade. A relación entre ambos [Feixoo era 19 anos maior ca el] prolóngase toda a vida, coas características propias das dun mestre e o seu discípulo. Esta obra sobre Feijoo foi moi difundida e tivo catro edicións en vida de Sarmiento.


Ao pouco tempo da morte de Sarmiento, publícanse algunhas das súas obras breves, mentres que outros dos seus escritos serán editados no século XIX. Recentemente, o Consello da Cultura Galega emprendeu un gran proxecto para recompilar e transcribir toda a súa obra, e publicala en catro volumes de máis de 1.500 páxinas cada un. O traballo é moito, porque os manuscritos están dispersos, moitos orixinais perdéronse, e das copias que se conservan hai que comprobar a súa fiabilidade.

## 2.2. DEFENSA DA CULTURA GALEGA

Sarmiento é un precursor dos xeógrafos de principios do século XX, xa que defende o coñecemento da contorna en que se vive. Decía: «Eu, que son de Galicia polos catro costados, sabía máis de China que do meu país orixinario». Por iso, pensa que hai que percorrer Galicia e facer un gran estudo xeográfico, pero non só de aspectos físicos, senón tamén económicos, políticos, históricos, folclóricos...

Ten unha curiosidade insaciable pola historia natural, polo mundo animal, vexetal e mineral. Estuda a flora e a fauna de Galicia con crite-





Sarmiento  
admiraba  
profundamente  
ao Padre Feixoo  
e así o amosou  
nalgunhas das  
súas obras

En Madrid, o Padre Sarmiento acórdase a miúdo da variedade de peixes das augas galegas e do seu exquisito sabor. Na abadía en que vivía, a dieta alimenticia consistía en moitos legumes e cereais, pouca carne e escasísimo peixe. Sarmiento, sempre traballando na súa cela, entre libros, sentado, sen apenas actividade física, engordaba. El mesmo escribía «Estou tan gordo que temo rebentar». Por iso estrañaba os peixes e mariscos galegos. Evocaba o sabor das ostras en escabeche recentemente feitas, pois dicía que as que algunha vez degustaba el en Castela estaban

rios modernos, de análises e clasificación. Propón o uso do microscopio e da disección. Opina que estes coñecementos deberían ocupar un lugar de honra no ensino escolar. A Botánica entusiásmalle. Con frecuencia envía a Galicia, ao seu irmán Javier, multitude de sementes para que as plantasen aquí e experimentasen a súa adaptación ao noso clima. Está pondo en práctica o método empírico do século XVIII.



xa avinagradas. En efecto, as ostras en escabeche eran moi apreciadas polas clases podentes do interior de España, os monarcas Borbóns e a Corte. Por esa razón chamábanlle escabeche real, consistente en fritilas con aceite, allo, loureiro, viño e vinagre e envasalas en barricas de madeira de cerdeira, o cal garantía uns meses de conservación.


Na súa cela, en Madrid, Sarmiento traballaba incansablemente, rodeado de moitos dos 10.000 libros da Biblioteca do convento. Na estancia había tamén variados instrumentos musicais, dous escritorios e unha mesa de traballo con 12 cadeiras para reunións.

### 2.3. DEFENSA DO IDIOMA GALEGO

Por decisión da Real Academia Galega, dedicóuselle a Martín Sarmiento o Día das Letras Galegas do ano 2002. Rendíase así homenaxe a un defensor da igualdade entre os sexos, a un firme opositor á pena de morte, pero, sobre todo, a un lingüista que defendeu unha lingua mal considerada socialmente no tempo en que viviu.

Sarmiento aprendera a falar en galego na súa infancia en Pontevedra e, moitos anos despois, sorpréndese cando, ao investigar en Toledo, atopa manuscritos antigos en galego, as *Cantigas de Santa María*, escritas por Afonso X, o Sabio. Aínda que escribe unha gran parte da súa obra en castelán, sempre fará unha rotunda e argumentada defensa do galego, animando a estudalo.

Sarmiento era plenamente consciente de que o galego era o idioma do pobo. Gravado da *Ilustración galega e asturiana*



A obra lingüística cume de Sarmiento é o conxunto de onomásticos, palabras acompañadas do seu significado, grazas ás cales hoxe podemos saber que termos se empregaban en Galicia no século XVIII [recollidos nas súas viaxes]. Ademais de ser o primeiro autor en preocuparse polo estudo do galego oral, fai unha análise científica etimolóxica, e acomete os primeiros estudos de filoloxía comparada entre o latín, o castelán, o francés, o italiano, o galego e o portugués.

Consciente de que o galego é o idioma do pobo, Sarmiento considera que o clero debe achegarse a el, e falarlle no seu mesmo idioma, por exemplo, na confesión e na predicación. E igualmente debe facer o persoal da xustiza e administración.





Unha das preocupacións de Sarmiento é a necesidade de que aos nenos se lles ensine na súa lingua materna, o galego. Gravado da *Ilustración galega e asturiana*

Unha das propostas nas que Sarmiento incide con maior vehemencia é na necesidade de que aos nenos se lles ensine en galego, a súa lingua materna. Argumenta que só así se logra unha plena comprensión e comunicación e, como consecuencia, os escolares aprenden mellor: «Se non se lles ensina aos nenos desde esa lingua que maman, as cousas non poden mellorar». Tamén se sitúa Sarmiento contra os mestres foráneos que descoñecen o idioma que falan os seus alumnos, o galego, e impóñenlles o castelán. Pensa que se lle debería esixir o dominio do galego a todo forasteiro que viñese exercer a súa profesión a Galicia.



*«Y es bárbara crueldad y necesidad excusada que unos forasteros enseñen a los niños gallegos mediante la lengua castellana que no saben (...), y castigándolos si se les escapa alguna voz o frase gallega de las que han mandado. Todo maestro de Gramática que no fuera gallego y erudito en su lengua patria, se debe excluir de ser maestro de niños gallegos, sea un Cicerón o un Quintiliano».*

Sarmiento defende a necesidade de que, nas escolas, aos nenos se lles imparta o ensino en galego, posto que é o seu idioma familiar e oral, e mellor vehículo de comunicación.

A Sarmiento, polo tanto, pódesele considerar un precursor das teorías de renovación pedagóxica e un adiantado á súa época, pois, ademais de avogar polo ensino en galego, lingua do pobo, considera que a aprendizaxe dos nenos debe comezar co coñecemento das cousas máis próximas, como os animais e a natureza en xeral do seu contorno. Anos despois, a fins do XIX, estas mesmas propostas serán abandeiradas pola

Institución Libre de Enseñanza, e, na actualidade, pola nova pedagogía.

«Quiero que se le enseñe la lengua gallega con especial cuidado, además de lo que deba charlotear con los otros niños. No pienses en que castellanice hasta que sepa bien y con extensión el gallego. No enseñes voz alguna gallega cuyo significado no toque con algún sentido exterior, palpándolo, viéndolo, remirándolo, gustándolo y oliéndolo.

Ni por pienso le has de embocar nombre de cosa intelectual y que no se ve (...). Lo principal es que se le impriman las voces de las cosas sencillas y visibles (...). Es una desalmada necesidad poner a los niños gallegos la jerga de la gramática antes de saber con mucha extensión la lengua gallega y todas las voces de la Historia natural, a lo menos de las visibles de su país (...).



A idea de Sarmiento de ensinar en galego aos nenos, foi abandeirada despois pola Institución Libre de Enseñanza. Gravado da Ilustración galega e asturiana



*Tengo evidencia de que un niño gallego si sabe ya bien su lengua entrará como por su casa a entender Latín, y después a entender el castellano mejor que los castellanos mismos. Testo sin estudiar nada de memoria, que es el coco, y el que promueve la ignorancia y la aversión a las letras en España».*

MARTÍN SARMIENTO.

*Carta a su hermano sobre la educación de  
Alfonsiño [Madrid, 1758]*

## 2.4. As 1.201 COPLAS GALEGAS


Este conxunto de coplas, escritas en galego, é o resultado do seu labor de recompilación de palabras, ditos, lendas, tradicións e formas de ser do pobo galego. A información recolleuna Sarmiento directamente, no transcurso da súa viaxe por Galicia en 1745. É un estudo feito co rigor da investigación científica, partindo dun traballo de campo. Pero, no canto de ordenar os datos e estruturalos en forma de vocabulario, Sarmiento, co material, fai coplas sinxelas e didácticas, comentadas parcialmente. E logo engádelles un glosario, co significado das pala-

bras ou expresións que considera que son máis difíciles de entender, e con vistas a un posible dicionario. Pretendía facer unha publicación baixo o pseudónimo do Poeta Marcos da Portela e chamada *Diálogo de 24 rústicos*, aínda que o título completo é *Colección de muchas palabras, voces y frases gallegas que el año 1745 oí, leí y observé en Galicia, estando a divertirme en la villa de Pontevedra en donde me he criado y habiendo andado por varias partes del Reyno*.

Portada do  
facsímile do  
*Coloquio en mil  
duascentas  
coplas galegas*  
editado polo  
Consello da  
Cultura Galega

**C**oloquio de 24 gallegos rústicos  
consiste en 1.201 coplas en galego,  
compostas por Sarmiento, inspiradas  
na realidade galega.

Moitas destas coplas son cuartetos de versos de seis sílabas, con rima asonante. Nelas, con graza e ritmo popular, describe lugares, costumes e tradicións, mesturadas con referencias históricas ou notas da vida local. Segundo Henrique Monteagudo, estas coplas constitúen o primeiro ensaio sobre o galego nun tempo en que non se consideraba merecedor de ser unha lingua para escribir.






## A ORDE DOS BENEDITOS

→ A Orde de San Bieito (en latín: Ordo Sancti Benedicti, O.S.B.) é a orde relixiosa fundada por Benito de Nursia, que segue a Regra ditada por este a principios do século VI para a abadía de Montecassino. Benito de Nursia contribuíu decisivamente á evanxelización cristiá de Europa, polo que é patrón do continente.

Seguindo o seu exemplo e inspiración, diversos fundadores de ordes relixiosas basearon a normativa dos seus mosteiros na Regra deixada por Benito, cuxo principio fundamental é Ora et labora, e que contén os tres votos beneditinos: estabilidade ou voto de permanencia no seo da comunidade, obediencia ao abade elixido por ela como mostra de humildade, e reforma dos costumes abrazando a pobreza e a castidade e renunciando ao mundo. A longa historia da orde fixo que pasase por varias reformas; as máis importantes, a de Cluny e a de Císter.



En Galicia, baixo a tradición visigoda, parece que a influencia de Cluny foi bastante débil, non constando documentación da regra adoptada na fundación dos mosteiros na Alta Idade Media. É a San Martín Dumienne, instalado en Galicia despois de pasar polas Galias e Roma, a quen se lle atribúe

A orde de San Bieito foi fundada por Benito de Nursia en torno ao século VI

tamén a propagación do movemento monástico. A mediados do século VII continúa o seu labor san Fructuoso; Galicia pobóase de novos mosteiros que van potenciar a agricultura, a gandería e os oficios en xeral, contribuíndo á repoboación do país ao instalarse en zonas antes despoboadas e illadas.\*



Como exemplo destas Coplas, reproducimos un fragmento no que fala sobre os nenos do campo que van mirar os ovos nos niños dos paxaros. Está recollendo unha tradición, unha crenza popular, consistente en que cando os rapaces miran os niños teñen que estar en silencio e sen despegar os beizos, para que o cuco non coma os ovos. Só salvarán aos ovos da voracidade do cuco se se refiren a eles como pedras de cuarzo, é dicir, «seixos».



*se se lles chama ovos,  
ven o cuco e cómeos  
se se lles chama seixos,  
vén o cuco e déixaos*

Outro fragmento das coplas, que seleccionamos, describe, de xeito detallado e pintoresca, a vila de Pontevedra, empregando expresións populares da fala oral.

*Na vila é costume  
depois que a coñezo  
que os sábados todos  
do ano e arreo,*

*se faga un mercado  
mercando e vendendo  
mil cousas do uso  
con muito comenzo*

*de olas, de potes,  
de asados, pucheiros,  
de pratos, cazolas,  
picheles e petos.*

Sarmiento foi dos primeiros en dar valor á literatura popular oral, así como en referirse á existencia dunha lírica medieval, que saíra á luz e sería admirada no século XIX.

**U**nha adega de viño, con denominación de orixe das Rías Baixas, patentou a marca de Martín Códax, un dos nosos trovadores medievais. A mesma empresa realiza agora viño coas cepas do Bierzo, e a marca non podía ser outra que Martín Sarmiento.



Gravado de  
José Cornide  
e Saavedra,  
por Cuevas



## JOSÉ CORNIDE E SAAVEDRA<sup>3</sup>

[A CORUÑA, 1734 – MADRID, 1803]

Naceu na Coruña, onde pasou a maior parte da súa vida. De familia fidalga, é un erudito de ampla formación autodidacta. Interésase pola economía, a historia, a ciencia, a xeografía, o dereito, a literatura, a xeografía, etc. En 1789, abandona a súa enorme actividade pública e retírase en Madrid para dedicarse a escribir ata a súa morte, sempre vinculado á Real Academia de Historia.

Fai unha gran defensa de Galicia. Sabe compaxinar a crítica dos problemas co seu traballo ao servizo da administración e ao sistema establecido. Ocupa importantes postos de responsabilidade, por exemplo, deputado nas Xuntas do Reino de



Galicia e capitán da Compañía de Milicias da Coruña. Fundador e secretario do Real Consulado da Coruña, impulsa a rehabilitación do faro romano chamado a torre de Hércules, baixo a dirección do enxeñeiro Giannini. Tamén é vogal e tesoureiro do Hospicio, codirector do Montepío de Pescadores e vogal da Xunta Nacional de Camiños. Pertence á Academia da Historia, á Academia de Agricultura de Galicia e ás Sociedades Económicas de Amigos do País da mesma cidade e da de Lugo. Pola súa afección ás obras dramáticas, mandou construír un pequeno teatro en Sada, onde se escenificaban pezas breves en galego, algunha da súa autoría.



### 3.1. A SÚA OBRA

Portada da obra  
de Cornide  
*Ensayo de una  
historia de los  
peces y otras  
producciones  
marinas de la  
costa de Galicia...*

Moitas das súas obras versan sobre o estudo de mares e peixes de Galicia e sobre a problemática pesqueira, propoñendo ideas para o progreso. Preocúpase das deficiencias das vías de comunicación e do estado dos recursos naturais. Escribe sobre as dificultades e problemas da educación, esencial para mellorar a situación das clases populares e poder saír da miseria. De entre estes libros, escritos

en castelán como era habitual nos autores da súa época, destacamos: *Descripción circunstanciada de la costa de Galicia, y raya por donde confina con el inmediato reino de Portugal* [1764], *Memoria sobre la pesca de la sardina en la costa de Galicia* [1774], *Ensayo de una historia de los peces y otras producciones marinas de la costa de Galicia...* [1778], *Memoria sobre el estado de la pesca en la costa de Galicia, causas que detienen sus progresos y medios de removerlos para su fomento* [1789], *Ensayo sobre el origen, progreso y estado de la Historia natural entre los antiguos anteriores a Plinio* [1791], etc. Ademais, consérvanse moitísimos manuscritos inéditos que haberá que ordenar e publicar.



Escudo  
na Casa  
Cornide

### 3.2. ESTUDOS SOBRE O GALEGO E CREACIÓN LITERARIA

A Cornide interesoulle o idioma galego, como demostran os seus traballos lexicolóxicos, consistentes nun amplo glosario galego-castelán, que inclúe recollida de coplas de tradición oral e fragmentos da lírica medieval.



## CASA-PAZO CORNIDE

→ En plena cidade vella da Coruña, na rúa das Damas, levántase a Casa-Pazo Cornide, un inmoble de estilo francés construído entre 1750 e 1760 e lugar de nacemento do polígrafo coruñés don José Cornide Saavedra e Folgueira, se ben non é seguro que nacesse no actual edificio. José Cornide, ademais de destacado intelectual, humanista, xeógrafo, escritor e benfeitor, foi coruñés de pro, como relata Carlos Martínez-Barbeito.

A Casa-Pazo Cornide comezou a construírse en 1748. O edificio puido ser proxectado polo enxeñeiro Francisco Llobet, o que explicaría o seu peculiar estilo, moi diferente ao da arquitectura civil coruñesa da época e que o fai excepcional «exemplo de palacete urbano de aire máis cortesán que local», en palabras de Alfredo Vigo no seu libro *A Coruña e o século das luces: a construción dunha Cidade de Comercio* [1700-1808]. Na súa fachada simétrica

destaca a cornixa superior, que rompe para a colocación do escudo de armas da familia, e as liñas curvas das súas esquinas.


Nun lateral da Casa-Pazo, o pobo coruñés manifestou a súa admiración e agradecemento ao intelectual coa seguinte inscrición gravada en pedra:

*«No ano 1734 naceu nesta casa D. José Cornide Folgueira e Saavedra, xeógrafo, historiógrafo e naturalista de Galicia. Morreu en Madrid en 1803. ¡Loor eterno ao sabio patriota galego! O pobo da Coruña dedica esta inscrición á súa memoria. 21 de agosto de 1892.» \**



Inscrición na Casa-Pazo Cornide, na coruñesa rúa das Damas





A obra *A Filida*, de Cornide, é un soneto de corte romántico e con notas costumbristas galegas. Gravado da *Ilustración galega e asturiana*

En canto á creación poética, ten tres composicións en galego. Unha refírese a unha representación dunha comedia en Sada, por medio de dezasete décimas. A segunda é unha décima satírica respondendo a un ataque que un señor lle fixo. A terceira é un poema en galego, que a crítica considera hoxe como unha obra das de maior valor literario de toda a época. Co título de *A Filida*, é un soneto de corte prerromántico. Anxo Tarrío afirma que é unha xoia da literatura galega, e exemplo do que puido ser a literatura prerromántica en Galicia, de seguir un proceso normal:

¿Viche, Filida amada, ó paxariño  
 que, arando desos aires nas campiñas,  
 descoidado se achanta polas liñas  
 que cauto cazador pon no camiño?

¿Viche qué forza fai para soltarse  
 e levar a bicada ós seus paxaros  
 [parte do corazón e fillos caros]  
 que deixara no niño ó remontarse?

Pois viche a quen che adora pola vida,  
 que, chantado no ichó dun imposibre,  
 cata aquí, cata alí si acha saída

para fuxir, podendo verse libre  
 e acurruxarse firma no teu seo  
 en que chocara atento o seu deseo.

CORNIDE SAAVEDRA,  
 A FILIDA

O soneto en galego A Filida, escrito polo ilustrado Cornide, é considerado pola crítica como o de máis alta calidade literaria do período dos Séculos Escuros.



A obra do cura  
de Fruíme  
valórase hoxe  
pola súa defensa  
do galego



## OUTROS ILUSTRADOS<sup>4</sup>

Outros moitos ilustrados produciu Galicia, que nos deixaron importantes obras escritas, case sempre en castelán. A defensa de Galicia estivo sempre nas súas argumentacións. O seu labor contribuíu a que, anos despois, a cultura e a literatura galega alcanzasen un espazo de calidade e recoñecemento dentro da literatura europea.

### 4.1. O CURA DE FRUÍME

Diego Antonio Cernadas e Castro

[Santiago, 1698 – Fruíme, A Coruña, 1777]

Naceu no seo dunha familia acomodada. Fíxose clérigo en 1729 e foi o párroco de Fruíme,



Diego Antonio Cernadas e Castro exerceu como profesor e párroco. Gravado da *Ilustración galega e asturiana*

en Lousame [A Coruña]. Na súa parroquia fai un gran labor educativo e cultural, pois dá clases de primaria e de agricultura aos seus habitantes.

Escrebe poesía e prosa, en castelán e en galego. E cada ano publica máis de 150 artigos. Por ser home claro, que expón o seu pensamento con valentía, fundamentalmente en defensa de Galicia, os seus escritos suscitaron polémicas. Cultiva a poesía en galego, na que denota o seu orgullo por ser galego e escribir no seu idioma natal. Presenta un estilo vivo e de gran soltura.



Ata os nosos días chegaron composicións un tanto ripiosas e plenas de ironía. Presenta variedade en temas e formas, aínda que moitas das súas poesías son de circunstancias, é dicir, da actualidade da súa época. Unhas son satíricas, ridiculizando a personaxes do seu tempo, e outras son laudatorias, en defensa do galego:

*Co desexo de acordarvos  
que en Galicia o seu funduxe  
ten a vosa nobre furuxe,  
vou en galego a falarvos.  
Desto non hai que estrañarvos,  
antes ben facendo gala  
desta nación, estimala,  
e, si porque moito dista,  
non a conocés de vista,  
conocédea pola fala.*

[...]

Igualmente escribe pezas dramáticas. Nunha delas, titulada *Loa para la fiesta de los Dolores Gloriosos de María Santísima en Fruíme*, introduce personaxes galaicos que fan os seus diálogos en galego.

Actualmente, máis que polo seu valor literario, a súa obra recoñécese pola súa defensa do idioma e da terra galega, como precursor do galeguismo.

## 4.2. O PADRE SOBREIRA

[Juan Sobreira Salgado]

[Evade, Ourense, 1746 – Madrid, 1805]

Ingresa na orde de San Bieito e vive en diferentes conventos. Coas súas continuas lecturas e estudos, alcanza un saber amplísimo nos máis diversos temas.

É un dos principais estudosos do galego no século XVIII. Durante oito anos traballou recompilando información, reunindo palabras coas que formar un vocabulario galego. A

súa orde decidira que elaborase un dicionario galego, pero o traballo era inxente e só puido completar as papeletas correspondentes ás voces das letras a e b.

O Padre  
Sobreira estivo  
no mosteiro de  
Santo Estevo  
de Ribas de Sil



Fixo traballos sobre léxico recollendo nomes de peixes e plantas de Galicia, así como un bo número de refráns e cantigas populares, contribuíndo á revalorización da literatura popular de tradición oral, ignorada naquel momento polos cultos. E traballou nun nomenclátor ou dicionario das cidades, vilas e lugares galegos. A maioría das súas obras quedaron inacabadas, e algunhas publicáronse de forma fragmentaria.

Reproducimos dúas cantigas populares, independentes, recollidas polo Padre Sobreira no século XVIII:

*Veño de Vigo e vou para Cangas  
tódalas mozas me miran as mangas.*

*Hora vel vai a raposa polo millo:  
ela non o come; pero vaino sacudindo.*

O Padre Sobreira recompilou palabras e vocábulos galegos coa finalidade, inconclusa, de elaborar un dicionario galego.




## BATAILHA DE RANDE

→ O 23 de outubro de 1702 prodúcese o episodio máis importante da historia de Vigo e un dos sucesos clave da Guerra de Sucesión española [1701-1713]. En setembro, vinte e tres galeóns españois regresan da India co maior cargamento ata a data de ouro e prata procedente de América. A frota estaba baixo o mando do Almirante Real do Océano Manuel de Velasco e Tejada. Acompañábaa e protexíaa 23 navíos franceses, ás ordes do almirante conde de Châteaurenaud.

Os ingleses e os seus aliados holandeses, sabedores do dano que podía carrexar a perda dunha frota enteira cargada de ouro e prata, deciden enviar senllas frotas dispostas a apresar a frota de India e dar conta do seu valioso cargamento. Ao decatarse de que estaban a ser perseguidos, a frota de India inténase na ría de Vigo.

Os anglo-holandeses, baixo o mando do almirante George Rooke, planearon un ataque anfibio e en menos de 10 horas a batalla se



A mala disposición das defensas e a superioridade anglo-holandesa fixeron que en menos de 10 horas as tropas españolas fosen derrotadas. Arquivo do Reino de Galicia


decidiu en favor dos atacantes. De Velasco ordenou voz en grito, o afundimento dos barcos, que segundo algunhas versións, terían conservado parte da súa carga.

Don José Chacón, irmán dun dos tres capitáns da frota española, foi testemuña de excepción do combate, que describe así: «O domingo 22



de outubro pola mañá arrivó sobre Vigo toda a Armada de Inglaterra, que se compoñía de máis de 150 navíos, os 70 de liña e os restantes de todo xénero de embarcacións, incluíndo algunhas carcassas de botar bombas, o mesmo día pola tarde chegaron a dar fondo na ría que chaman de Teis, mui preto dos nosos navíos e logo saín do meu Almiranta con toda a xente da súa dotación

Gravado da batalla de Rande que tivo lugar na ría de Vigo o 23 de outubro de 1702. Arquivo do Reino de Galicia





ao forte do Norte onde estaba sinalado don Manuel Velasco con todas as Compañías de Infantaría dos Vageles franceses. Aquela noite [o inimigo] intentou vir por tres veces á cadea de onde foi rexeitado, pola mañá recoñecéndose que o seu desembarco era por Teis, mandou o Sr. Conde de Chatternaut que todas as demais compañías pasaran ao forte de Rande incluíndoas do meu irmán Don Fernando Chacón e haviendo gañado o forte quedou este prisioneiro e ferido na caveza e vendo o Sr. Conde de Chatternaut que gañado o forte de Rande era dono dos navíos [o inimigo] deu horden para que todos se queimasen, agás algúns que lles faltaron as minas non se prenderon no incendio, casso benfatal... con tanto tesón dunha e outra parte, que, mesturados os paus, case era inútil o canón. Pelexábase con lumes de inhumano artificio, potas, camisas e bólas de betume ardente. Desexaban os franceses vir ao bordo, porque estaban máis ben gornecidos de xente de guerra; pero os ingleses toda a lide acometeron ao lume, e sendo en número superiores, non podían defenderse dez naves de tanta multitude de paus inimigos, que suplían sempre os maltratados.»\*

### 4.3. MARÍA FRANCISCA DE ISLA E LOSADA [Santiago de Compostela, 1734-1808]

Encargouse de recompilar e editar a obra do ilustrado Padre Isla [José Isla da Torre], do que era irmá de pai. Tamén escribiu, en castelán, unha biografía sobre el.

Como poetisa, escribiu en castelán e en galego, pero apenas se conserva a súa obra, posto que mandou que se queimasen todos os seus escritos



Lucas Labrada  
Romeu era  
fillo dun  
profesor de  
gramática.  
Gravado da  
*Ilustración  
galega e  
asturiana*

logo da súa morte. Da súa autoría consérvase un romance en galego, de case 100 versos, que dirixiu a Diego Antonio Cernadas, coñecido como o cura de Fruíme, ao que lle unían fortes lazos de amizade. O romance é unha especie de epístola en verso, que rezuma ironía e intelixencia.

Polo seu talento, chamóuselle Musa Compostelá e Perla Galega. Francisca de Isla foi admirada nun momento en que a consideración social e cultural da muller era baixa. Por vez primeira, a voz dos ilustrados empezaba a expor o recoñecemento do valor e papel da muller na sociedade.

M.<sup>a</sup> Francisca de Isla, chamada Musa Compostelá e Perla Galega, obtivo o recoñecemento dos seus coetáneos.

#### 4.4. LUCAS LABRADA ROMEU

[Ferrol, 1762-1842]

É o ilustrado galego de procedencia máis modesta, fillo dun profesor de gramática. Traballou case sempre para o Consulado da Coruña, no que chegou a desempeñar os cargos de secretario e



contador. Deixounos a estimable obra *Descripción económica del Reino de Galicia*, escrita en 1803 e publicada en Ferrol ao ano seguinte, na que analiza e describe toda a actividade económica galega daquel momento, e fai formulacións encamiñadas ao progreso. Propón a repartición de montes, a potenciación da súa agricultura e industria, e unha reforma administrativa de Galicia que racionalice e faga máis efectivo o seu funcionamento.

#### 4.5. IRMÁNS DO PADRE FEIXOO

E para rematar, citamos a dous irmáns do erudito Padre Feixoo. Un deles, **Anselmo Feixoo**,

María Francisca de Isla naceu en Santiago e era coñecida como a Musa Compostelá. Na fotografía vista da Praza do Obradoiro no século XIX



realizou unha composición en quintillas lamentando a derrota ante os ingleses en Rande, na ría de Vigo, en 1702. Do outro irmán, **Plácido Feixoo**, reproducimos un fragmento dun poema en galego. Trata sobre a dificultade coa que se atopa para escribir en galego, o idioma oral da súa infancia, nunca estudado.

*Escoiten que falo eu  
na miña lingua galega,  
que anque teño a musa lega  
e para copras non naceu,  
unha nai que me pareu  
i outra vella, miña tía,  
deron connmigo a porfía  
sobre o galego falar  
e nil me mandan glosar  
el acaso de este día.  
Pero eu ben podo dezir  
Que, anque en ela me criei,  
Eínda falar non sei  
Nin eínda a sei escribir...*

PLÁCIDO FEIXOO

## A TORRE DE HÉRCULES DA CORUÑA E O ARSENAL DE FERROL



Non hai  
constancia de  
mencións  
sobre a torre  
anteriores ao  
século IV

→A torre de Hércules da Coruña, así como o Arsenal e os castelos de Ferrol, forman parte da nosa identidade cultural.

A torre de Hércules é un prodixio arquitectónico. O vello faro romano do século II, que estaba ruinoso, foi rehabilitado no século XVIII co impulso e as luces da Ilustración. A restauración promoveu unha institución creada nese século, o Real Consulado da Coruña. O

ilustrado galego José Cornide

aportou a esta empresa todo o seu entusiasmo. Baixo a

dirección do enxeñeiro Giannini, entre 1788 e 1790 consolidouse a parte interior dos muros de factura romana, conservando unha importante parte da construción orixinal, e reconstruíuse o exterior con criterios modernos, á vez que se suprimían as súas ramplas externas en espiral para levantar unha escaleira interior. A torre brillou de novo sobre os mares galaicos. En 2009 foi considerada pola Unesco



patrimonio da humanidade, e hoxe considérase «a luz da humanidade».

O arsenal e os castelos da bocana da ría de Ferrol son froito da política dos monarcas ilustrados Fernando VI e Carlos III. Os mellores enxeñeiros do momento participaron nos planos e execución da obra, levada a cabo no século XVIII. Francisco Montaigú, Cosme Álvarez, La Croix, Miguel Marín... e, sobre todo, Jorge Juan e Julián Sánchez Bort achegaron os seus amplos coñecementos.



O arsenal de Ferrol aspira a ser patrimonio da humanidade









XACOBEO 2010  
Galicia



XUNTA  
DE GALICIA

